

**PEMBANGUNAN SOSIOEKONOMI DAN INSAN MENURUT MAQASID SYARIAH:
ANALISIS KEPELBAGAIAN MEKANISME PEMBERIAN HARTA DALAM ISLAM**

***SOCIOECONOMIC AND HUMAN DEVELOPMENT ACCORDING TO MAQASID
SHARIAH: AN ANALYSIS OF THE DIVERSITY OF WEALTH DISTRIBUTION
MECHANISMS IN ISLAM***

Mohd Ramizu Abdullah @ Zakaria¹

Muhammad Uwais Aqili Mohd Zain²

Suraini Saufi^{3*}

¹Faculty of Syariah and Muamalat, Sultan Ismail Petra International Islamic University College, 15370 Kota Bharu, Kelantan, Malaysia. (Emel: dr.ramizu@kias.edu.my)

² Faculty of Syariah and Muamalat, Sultan Ismail Petra International Islamic University College, 15370 Kota Bharu, Kelantan, Malaysia. (Emel: uwais@kias.edu.my)

³Faculty of Management and Human Development, Sultan Ismail Petra International Islamic University College, 15370 Kota Bharu, Kelantan, Malaysia. (Emel: suraini@kias.edu.my)

*Corresponding author: (Emel: suraini@kias.edu.my)

Abstrak

Pelbagai mekanisme pemberian harta yang digariskan oleh Islam seperti zakat, infaq, sedekah, wakaf, hibah, wasiat, fidyah, kafarah dan qard hasan berfungsi sebagai instrumen penting bagi mengekalkan keseimbangan sosioekonomi serta membina kesejahteraan insan. Kajian ini memberi tumpuan kepada analisis kepelbagaian mekanisme tersebut dengan menilai peranan strategiknya terhadap pembangunan sosioekonomi dan insan berpandukan maqasid syariah. Kaedah kualitatif digunakan melalui penelitian sumber primer dan sekunder bagi meneliti hubungan antara mekanisme pemberian harta dan dimensi pemeliharaan agama, nyawa, akal, keturunan serta harta. Dapatan kajian menunjukkan bahawa setiap mekanisme bukan sahaja memastikan pengagihan kekayaan yang adil, malah memperkukuh solidariti sosial, meningkatkan kualiti hidup dan menyumbang kepada pembentukan insan seimbang. Kajian ini turut mengetengahkan isu serta cabaran dalam pengamalan mekanisme pemberian harta pada masa kini, di samping mengemukakan cadangan ke arah pengoptimuman pelaksanaannya. Secara keseluruhan, hasil kajian ini memperlihatkan kepentingan pemberian harta Islam sebagai instrumen yang mampu memacu pembangunan sosioekonomi dan kesejahteraan insan secara mampan.

Kata kunci: Pemberian harta, mekanisme, sosio ekonomi, maqasid syariah.

Abstract

Various wealth distribution mechanisms outlined in Islam such as zakat, infaq, sadaqah, waqf, hibah, wasiat, fidyah, kafarah, and qard hasan serve as vital instruments for maintaining socio-economic balance and fostering human well-being. This study focuses on analyzing the diversity of these mechanisms by evaluating their strategic roles in socio-economic and human development based on the principles of maqasid al-shariah. A qualitative approach was employed through the examination of primary and secondary sources to explore the relationship between wealth distribution mechanisms and the dimensions of preserving religion, life, intellect, lineage, and property. The findings indicate that each mechanism not only ensures equitable wealth distribution but also strengthens social solidarity, enhances quality of life, and contributes to the development of a well-balanced individual. The study also highlights current issues and challenges in the implementation of these wealth distribution mechanisms and offers recommendations for optimizing their practice. Overall, the findings demonstrate the importance of Islamic wealth distribution as an instrument capable of driving sustainable socio-economic development and human well-being.

Keywords: *Wealth distribution, mechanisms, socio-economy, maqasid al-shariah.*

PENDAHULUAN

Islam merupakan agama yang *syumul* (komprehensif) atau sempurna yang mencakupi seluruh aspek kehidupan manusia samada rohani, jasmani, individu dan masyarakat. Islam juga menekankan keseimbangan antara pembangunan material dan spiritual. Antara pendekatan yang ada adalah melalui ekosistem ekonomi Islam yang berteraskan keadilan dan tanggungjawab sosial. Salah stu ekosistem ini ialah mekanisme pemberian harta yang meliputi pelbagai instrument seperti zakat, wakaf, sedekah dan hibah. Mekanisme ini menggalakkan pengagihan harta dan kekayaan secara adil dan berperanan memperkukuh hubungan sosial dan mempertingkatkan kesejahteraan ummah. Dalam konteks semasa, kepelbagaian mekanisme pemberian harta perlu difahami secara lebih strategik agar ia dapat berfungsi sebagai pemangkin Pembangunan sosioekonomi dan insan sejajar dengan prinsip maqasid syariah yang menekankan pemeliharaan agama, nyawa, akal, keturunan dan harta.

Menurut perspektif Islam, harta bukan hanya sekadar simbol kekayaan material, tetapi juga merupakan satu bentuk amanah yang harus diurus dengan penuh tanggungjawab bagi memastikan kesejahteraan individu dan masyarakat. Islam bukan

sekadar mengiktiraf pemilikan harta secara peribadi, tetapi juga menetapkan mekanisme yang jelas dalam pengagihan dan penggunaannya supaya kekayaan tidak tertumpu dalam kalangan golongan tertentu sahaja. Ini bertepatan dengan firman Allah SWT.

مَا أَقَاءَ اللَّهُ عَلَى رَسُولِهِ مِنْ أَهْلِ الْقُرَى فَلِلَّهِ وَلِلرَّسُولِ وَلِذِي الْقُرْبَىٰ وَالْيَتَامَىٰ وَالْمَسْكِينِ وَابْنِ السَّبِيلِ
كَي لَا يَكُونَ دُولَةً بَيْنَ الْأَغْنِيَاءِ مِنْكُمْ وَمَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا وَاتَّقُوا اللَّهَ إِنَّ اللَّهَ شَدِيدُ الْعِقَابِ

Terjemahan: "Apa sahaja harta rampasan (*fa'i*) yang dikurniakan oleh Allah kepada Rasul-Nya (daripada harta penduduk negeri-negeri yang menyerah kalah tanpa peperangan), maka adalah ia untuk Allah, Rasul-Nya, kaum kerabat (Rasulullah), anak-anak yatim, orang-orang miskin dan orang-orang yang terlantar dalam perjalanan, supaya harta itu tidak hanya beredar di antara orang-orang kaya di kalangan kamu. Apa yang diberikan Rasul kepadamu maka terimalah, dan apa yang dilarangnya bagimu maka tinggalkanlah. Dan bertakwalah kepada Allah; sesungguhnya Allah sangat keras hukuman-Nya." (Surah Al-Hasyr: 7)

Oleh itu, konsep keadilan dalam pengagihan harta menjadi tunjang dalam ekonomi Islam, dengan pelbagai mekanisme pemberian harta yang bertujuan untuk mencapai keseimbangan sosial dan kestabilan ekonomi. (Al-Qaradawi, 2000).

Dalam konteks maqasid syariah, pengagihan harta yang sistematik memainkan peranan penting dalam memelihara lima aspek utama, iaitu agama (*hifz al-dīn*), nyawa (*hifz al-nafs*), akal (*hifz al-'aql*), keturunan (*hifz al-nasl*), dan harta (*hifz al-māl*) (Al-Ghazali, 1997). Sebagai contoh, zakat bukan hanya sekadar satu kewajipan bagi umat Islam, tetapi berfungsi sebagai alat untuk mengurangkan kemiskinan dan ketidakseimbangan sosial (Al-Zuhayli, 2006). Begitu juga dengan wakaf yang menyediakan sumber kewangan berterusan bagi sektor pendidikan, kesihatan, dan pembangunan masyarakat. Selain itu, instrumen lain seperti hibah, wasiat, infaq, sedekah, fidyah, kafarah, dan qard hasan turut memberikan manfaat kepada golongan yang memerlukan serta membantu dalam memperkukuhkan ekonomi ummah.

Mekanisme pemberian harta dalam Islam juga menggalakkan sikap dermawan dan kebersamaan dalam masyarakat. Dalam sebuah masyarakat yang mengamalkan pengagihan harta secara adil, jurang sosial dapat dikurangkan, dan kestabilan

ekonomi dapat dipelihara. Namun, pelaksanaan mekanisme ini dalam era moden menghadapi pelbagai cabaran, termasuk kurangnya kesedaran dalam kalangan umat Islam, isu birokrasi dalam pengurusan institusi berkaitan, serta perubahan ekonomi global yang menuntut pendekatan yang lebih dinamik dan strategik. (Ibn Qudamah, 1992).

Artikel ini bertujuan mengenalpasti konsep dan kepentingan pengagihan harta dalam Islam, mekanisme pemberian harta dan kaitan dengan maqasid syariah, hikmah kepelbagaian mekanisme pemberian harta dalam Islam dan cabaran dalam mengamalkan mekanisme pemberian harta. Objektif ini membolehkan pelbagai pihak dapat melihat dengan jelas peranan strategik pembahagian harta menurut Islam terhadap pembangunan sosioekonomi serta Pembangunan insan menurut maqasid syariah.

SOROTAN LITERATUR

Kajian mengenai mekanisme pemberian harta dalam Islam di Malaysia masih menunjukkan jurang akademik yang ketara. Sebahagian besar penyelidikan dan laporan institusi lebih menumpukan kepada aspek kutipan serta agihan zakat dan pembangunan aset wakaf, berbanding instrumen lain seperti hibah, fidyah dan qard al-hasan. Sebagai contoh, Lembaga Zakat Selangor melaporkan kutipan tertinggi dalam sejarahnya iaitu sebanyak RM1.22 bilion pada tahun 2024 (Lembaga Zakat Selangor, 2024), manakala Majlis Agama Islam dan Adat Melayu Perak turut mencatatkan peningkatan kutipan kepada RM253 juta pada tahun 2024 (MAIP, 2024). Dari sudut wakaf, laporan rasmi menunjukkan jumlah tanah wakaf yang dibangunkan melebihi 18,000 hektar di seluruh negara, menggambarkan kepentingan strategiknya sebagai aset sosial-ekonomi (JAWHAR, 2023).

Kajian mengenai mekanisme pemberian harta dalam Islam mendapati bahawa meskipun pelbagai instrumen telah diperkenalkan, masih terdapat cabaran dalam pelaksanaannya yang menyebabkan manfaatnya kurang dioptimumkan. Salah satu isu utama ialah kurangnya kesedaran dan pemahaman dalam kalangan individu, di mana kebanyakan umat Islam lebih menumpukan kepada zakat sebagai satu-satunya

bentuk pengagihan kekayaan, tanpa memahami peranan instrumen lain seperti hibah dan wakaf yang turut berpotensi besar dalam meningkatkan kesejahteraan sosial dan ekonomi (Mohd, Yaacob, & Salleh, 2021).

Selain itu, institusi yang menguruskan pemberian harta sering kali berhadapan dengan kelemahan dalam sistem pengurusan aset serta perundangan yang kompleks, terutama dalam hal berkaitan pentadbiran wakaf dan hibah, yang boleh menghalang keberkesanan pelaksanaannya (Ishak, Halim, & Rahman, 2019). Ketiadaan garis panduan yang jelas serta birokrasi yang panjang juga menyebabkan aset wakaf dan hibah tidak dapat dimanfaatkan secara optimum untuk manfaat masyarakat yang memerlukan (Rahman & Ismail, 2022). Oleh itu, kajian ini meneliti secara mendalam kepelbagaian mekanisme pemberian harta dalam Islam dengan tujuan menilai keberkesanannya dalam mencapai maqāṣid al-sharī'ah, khususnya dalam aspek keadilan sosial, pembangunan ekonomi, dan kesejahteraan umat. Dengan memperkukuhkan kesedaran masyarakat, memperbaiki sistem pengurusan aset, serta menyeimbangkan aplikasi setiap mekanisme pemberian harta, instrumen-instrumen ini dapat berfungsi secara lebih efektif dalam merealisasikan prinsip keadilan dan kesejahteraan yang dianjurkan oleh Islam (Mohd et al., 2021).

Manakala kajian mengenai hibah, fidyah dan qard al-hasan pula dilihat masih kurang diberikan perhatian dari sudut kajian empirikal dan analisis polisi. Literatur sedia ada mengenai hibah misalnya, lebih tertumpu kepada isu perundangan, prosedur pentadbiran, atau kajian kes tertentu, tetapi tidak menghubungkan secara langsung dengan pencapaian maqasid al-shariah (Syahraini Tambak & Sukenti, 2021). Begitu juga, instrumen fidyah dan qard al-hasan sering disebut sebagai mekanisme sokongan kebajikan, namun belum dikaji secara mendalam dari sudut keberkesanan dalam mencapai matlamat syariah seperti pemeliharaan agama, nyawa, akal, keturunan dan harta (Dusuki, 2018).

Tambahan pula, pada peringkat global, kutipan zakat formal hanya dianggarkan sekitar USD15 bilion setahun, jauh lebih kecil daripada potensi teorinya, menandakan terdapat ruang besar untuk pengoptimuman instrumen alternatif dalam pengagihan

kekayaan umat Islam (World Bank, 2022). Jurang ini menunjukkan keperluan penyelidikan yang lebih komprehensif untuk menilai bagaimana kepelbagaian mekanisme pemberian harta Islam boleh diselaraskan bagi menyumbang kepada kesejahteraan sosial, pengurangan kemiskinan, dan keadilan redistributif, selaras dengan kerangka maqasid al-shariah.

Melihat kepada kajian-kajian terkini, terdapat perkembangan positif dalam kajian wakaf digital, aplikasi blockchain dalam zakat dan inovasi hibah. Namun, masih terdapat jurang yang perlu diteliti secara kritikal. Sebagai contoh, Khairi, Ahmad, Laili, Sabri dan Shaari (2022) membangunkan sistem demo backend menggunakan kontrak pintar untuk kutipan zakat di MAIWP-PPZ berasaskan platform blockchain Hyperledger. Kajian ini membuktikan potensi dari segi kecekapan dan ketelusan, tetapi masih terhad kepada peringkat prototaip dan tidak menilai keberkesanan dalam konteks maqasid syariah. Dalam konteks yang sama, Nazeri dan Mohd Nor (2023) menekankan bahawa pelaksanaan blockchain dalam sistem zakat perlu dilihat bukan sahaja dari aspek teknologi, tetapi juga isu perundangan, kebolehpercayaan masyarakat dan integrasi dengan amil tradisional. Selain itu, Jalal dan Che Abdullah (2023) meneliti cabaran pengumpulan zakat atas aset digital di Kuala Lumpur, Selangor dan Perlis, dan mendapati bahawa kefahaman awam yang rendah serta ketiadaan garis panduan syariah yang seragam menjadi penghalang utama kepada kutipan berkesan. Dalam bidang wakaf, Zaki, Mushtaq, Hamdard dan Mahvish (2022) mencadangkan model pengurusan wakaf tunai berasaskan fintech untuk meningkatkan keterangkuman kewangan dan kebajikan masyarakat, namun penilaian empirikal tentang kesannya masih belum menyeluruh.

Dari sudut hibah pula, Mohd Izzat Amsyar Mohd Arif, Faezy Adenan dan Shofiyyah Moidin (2023) menganalisis aspek perundangan hibah amanah dalam industri kewangan Islam di Malaysia, dengan menyorot isu enforceability dan perlindungan benefisiari. Secara keseluruhan, meskipun kajian terkini menekankan potensi inovasi teknologi dan instrumen baharu dalam zakat, wakaf, dan hibah, kebanyakannya masih berbentuk konseptual atau prototaip, dengan bukti empirikal tentang pencapaian maqasid syariah yang masih terhad.

Justeru, kajian ini memainkan peranan penting dalam memperkukuhkan kefahaman dan pelaksanaan mekanisme pemberian harta dalam Islam, khususnya dalam aspek pembangunan ekonomi dan sosial. Mekanisme seperti zakat, hibah, dan wakaf bukan sahaja bertindak sebagai alat pengagihan kekayaan tetapi juga sebagai instrumen yang dapat memperkasakan kesejahteraan masyarakat secara berterusan (Mohd, Yaacob, & Salleh, 2021). Kajian mekanisme pembahagian harta dalam Islam mempunyai beberapa kepentingan utama. Pertama, kajian ini akan membantu individu dan institusi memahami peranan serta kepentingan setiap mekanisme pemberian harta dalam Islam. Ramai dalam kalangan masyarakat hanya menumpukan kepada zakat sebagai satu-satunya bentuk pemberian harta, sedangkan hibah dan wakaf juga boleh berfungsi sebagai instrumen pengagihan kekayaan yang berkesan. Dengan meningkatkan kesedaran dan pemahaman terhadap kepelbagaian mekanisme ini, masyarakat akan lebih cenderung untuk memanfaatkannya secara menyeluruh bagi memastikan harta diagihkan dengan lebih adil dan produktif.

Kedua, Institusi seperti pusat zakat, badan wakaf, dan institusi kewangan Islam sering menghadapi cabaran dalam pengurusan dan pentadbiran aset yang diberikan oleh individu serta organisasi. Kajian ini memberikan cadangan konkrit bagi menambah baik sistem pengurusan mekanisme pemberian harta agar lebih sistematik dan berkesan (Ishak, Halim, & Rahman, 2019). Dengan adanya dasar yang lebih kukuh dan kaedah pengurusan yang lebih efisien, institusi-institusi ini boleh berfungsi dengan lebih baik dalam melaksanakan tanggungjawab mereka terhadap masyarakat, sekali gus memastikan objektif maqāṣid al-sharī'ah dapat dicapai.

Ketiga, salah satu objektif utama maqāṣid al-sharī'ah adalah memastikan kesejahteraan masyarakat melalui keadilan sosial dan pengagihan harta yang seimbang. Dengan meneliti dan menilai bagaimana setiap mekanisme pemberian harta berfungsi, kajian ini dapat membantu memperbaiki dan mengoptimumkan pelaksanaannya bagi memastikan manfaat yang lebih besar kepada masyarakat, terutamanya golongan asnaf dan mereka yang memerlukan (Rahman & Ismail, 2022). Selain itu, dengan memperkukuhkan pengurusan aset Islam seperti wakaf dan hibah,

kesejahteraan ekonomi masyarakat dapat dipertingkatkan melalui pembangunan institusi yang mampan dan lestari.

Analisis daripada Al-Quran dan hadis menjadi tunjang utama rujukan bagi mekanisme pembahagian harta dalam Islam. Beberapa ayat dan hadis menyebut mekanisme tersebut dengan justifikasi dan konsep yang tersendiri.

Jadual 1: Sorotan Literatur daripada Al-Quran dan Hadis Terhadap Pembahagian Harta dalam Islam

Bil.	Mekanisme	Sumber (al-Quran / Hadis)	Huraian / Prinsip Utama	Peranan terhadap Sosioekonomi & Insan
1	Zakat	“Sesungguhnya zakat itu hanyalah untuk orang fakir, miskin...” Surah al-Taubah (9:60)	Instrumen wajib bagi pengagihan kekayaan; memurnikan harta dan jiwa.	Mengurangkan jurang pendapatan, memperkukuh solidariti sosial dan membersihkan hati daripada sifat tamak.
2	Infaq	“Belanjakanlah sebahagian daripada rezeki yang baik yang kamu perolehi...” Surah al-Baqarah (2:267)	Perbelanjaan sukarela di jalan Allah tanpa mengharapkan balasan duniawi.	Menggalakkan semangat ihsan, memperkukuh hubungan sosial dan menyumbang kepada kebajikan umum.
3	Sedekah	“Sedekah itu dapat memadamkan dosa sebagaimana air memadamkan api.” - Hadis riwayat Muslim	Sumbangan sukarela untuk membantu mereka yang memerlukan.	Memupuk kasih sayang, empati, dan membentuk masyarakat penyayang serta harmoni.
4	Wakaf	“Apabila mati anak Adam, terputuslah amalannya kecuali tiga perkara: sedekah jariah...” - Hadis riwayat Muslim	Penyerahan harta untuk kegunaan awam secara kekal (sedekah jariah).	Menyokong pembangunan pendidikan, kesihatan, dan ekonomi umat Islam secara berterusan.
5	Hibah	“Dan Allah melebihkan sebahagian kamu atas sebahagian yang lain dalam rezeki...” - Surah an-Nahl (16:71)	Pemberian harta secara sukarela semasa hidup tanpa balasan.	Mengukuhkan kasih sayang keluarga dan mengelak pertelingkahan harta selepas kematian.
6	Wasiat	“Diwajibkan ke atas kamu apabila seseorang di antara kamu hampir mati, jika	Pesanan pembahagian harta selepas kematian, tertakluk kepada	Menjamin hak bukan waris dan menjaga keadilan sosial selepas kematian.

Bil.	Mekanisme	Sumber (al-Quran / Hadis)	Huraian / Prinsip Utama	Peranan terhadap Sosioekonomi & Insan
		ia meninggalkan harta...” - Surah al-Baqarah (2:180)	had satu pertiga harta.	
7	Fidyah & Kafarah	tentang fidyah bagi orang tidak mampu berpuasa; Hadis riwayat Bukhari – tentang kafarah sumpah dan kesalahan. -Surah al-Baqarah (2:184)	Denda berbentuk bayaran atau pemberian makanan kepada fakir miskin sebagai tebusan kesalahan.	Membersihkan dosa, membantu fakir miskin dan menggalakkan tanggungjawab moral dalam masyarakat.
8	Qard Hasan (Pinjaman Kebajikan)	“Siapakah yang mahu memberi pinjaman kepada Allah, pinjaman yang baik...” -Surah al-Baqarah (2:245)	Pinjaman tanpa faedah yang diberi dengan niat membantu.	Mengurangkan beban kewangan dan memperkukuh budaya tolong-menolong dalam ekonomi Islam.
9	Faraid (Pusaka)	“Allah perintahkan kamu tentang (pembahagian harta) anak-anak kamu...” -Surah an-Nisa’ (4:11–12)	Sistem pembahagian harta pusaka berdasarkan ketetapan Allah.	Menjamin keadilan dalam warisan, mengelak pertikaian dan memastikan keseimbangan ekonomi keluarga.

Sorotan literatur daripada Jadual 1 menunjukkan bahawa Islam telah menetapkan pelbagai mekanisme pemberian dan pembahagian harta yang syumul, adil dan berteraskan wahyu Ilahi seperti zakat, infaq, sedekah, wakaf, hibah, wasiat, qard hasan dan faraid. Sistem ini telah diwahyukan oleh Allah SWT sejak lebih 1,400 tahun yang lalu bagi menjadi panduan kesejahteraan manusia, lebih awal mendahului kemunculan sistem kewangan dan sistem kewangan moden. Secara keseluruhannya, sistem pemberian harta dalam Islam membuktikan keunggulan syariah sebagai asas kepada pembangunan sosioekonomi yang adil, sejahtera dan lestari.

METODOLOGI

Kajian ini menggunakan pendekatan kualitatif kerana ia bertujuan untuk memahami secara mendalam konsep, prinsip, dan pelaksanaan mekanisme pemberian harta dalam Islam serta hubungannya dengan maqasid syariah. Pendekatan ini dipilih bagi

menganalisis bagaimana setiap mekanisme seperti zakat, hibah, dan wakaf berperanan dalam mencapai kesejahteraan sosial dan ekonomi dalam masyarakat Islam. Kaedah kualitatif sesuai digunakan apabila penyelidik ingin meneliti isu yang kompleks dengan menekankan makna dan tafsiran yang lahir daripada teks dan dokumen (Creswell, 2018).

Kajian ini menggunakan kaedah analisis dokumen sebagai kaedah utama dalam mengumpulkan dan menganalisis data. Analisis dokumen melibatkan kajian terhadap sumber-sumber primer dan sekunder yang berkaitan dengan mekanisme pemberian harta dalam Islam, termasuk kitab-kitab fiqh, jurnal akademik, laporan institusi Islam, serta dokumen rasmi berkaitan perundangan Islam dan pengurusan harta. Pemilihan dokumen dibuat secara sistematik berdasarkan lima kriteria: (i) relevansi topik, iaitu hanya dokumen berkaitan zakat, wakaf, hibah, fidyah, dan qard al-hasan yang dikaitkan dengan maqasid syariah; (ii) tempoh masa, dengan memberi penekanan pada dokumen terkini (2018–2024) untuk memastikan kesegaran maklumat, disamping rujukan klasik untuk asas teori; (iii) sumber autoritatif, seperti kitab turath, artikel jurnal berindeks, laporan rasmi institusi Islam, dan dokumen undang-undang; (iv) konteks Malaysia dan antarabangsa, iaitu keutamaan pada kajian Malaysia tetapi tidak menolak rujukan luar negara untuk perbandingan kritikal; dan (v) kredibiliti penerbitan, hanya sumber berwasit atau rasmi digunakan, manakala blog atau dokumen tidak sahih diketepikan (Bowen, 2009). Data dalam kajian ini diperoleh daripada dua kategori utama:

- i- Sumber Primer: merangkumi teks-teks utama dalam Islam seperti al-Quran dan hadis, serta pandangan fuqaha mengenai konsep dan prinsip pemberian harta dalam Islam.
- ii- Sumber Sekunder: terdiri daripada jurnal akademik, buku ilmiah, laporan institusi berkaitan zakat, hibah, dan wakaf, serta kajian terdahulu yang berkaitan dengan pengagihan kekayaan dan maqasid syariah (Ishak et al., 2019).

Data dalam kajian ini dikumpulkan melalui dua kaedah utama. Pertama ialah kajian literatur, yang melibatkan analisis bahan ilmiah seperti buku, jurnal akademik, artikel penyelidikan, dan tesis berkaitan dengan konsep pemberian harta dalam Islam serta maqasid syariah. Melalui kajian literatur, gambaran menyeluruh dapat diperoleh mengenai prinsip, pelaksanaan, serta cabaran dalam pengagihan harta melalui instrumen seperti zakat, hibah, dan wakaf (Mohd et al., 2021). Kajian ini juga menilai teori dan pendekatan yang digunakan oleh sarjana Islam terdahulu dalam memahami bagaimana setiap mekanisme pemberian harta dapat dioptimumkan untuk kesejahteraan masyarakat.

Kedua ialah kajian dokumentasi, yang melibatkan analisis terhadap dokumen rasmi seperti undang-undang dan garis panduan berkaitan pengurusan zakat, hibah, dan wakaf. Sumber utama termasuk perundangan Islam di Malaysia seperti Enakmen Wakaf Negeri, Akta Pentadbiran Undang-Undang Islam, dan laporan institusi Islam seperti Majlis Agama Islam Negeri (MAIN), pusat zakat, serta badan wakaf (Ishak et al., 2019). Kajian dokumentasi turut merangkumi fatwa-fatwa berkaitan serta garis panduan institusi Islam dalam pengurusan harta, yang dapat memberikan perspektif mengenai cabaran dan cadangan penambahbaikan dalam pelaksanaan mekanisme pemberian harta ini (Rahman & Ismail, 2022).

Bagi menilai dan mentafsir maklumat yang diperoleh daripada pelbagai sumber tersebut, analisis kandungan digunakan sebagai teknik utama. Analisis kandungan dilakukan dengan mengenal pasti tema utama berkaitan mekanisme pemberian harta dalam Islam, mengkaji bagaimana konsep ini diaplikasikan dalam institusi Islam dan amalan masyarakat, serta menilai sejauh mana mekanisme ini menyumbang kepada pencapaian maqasid syariah, khususnya dalam aspek keadilan sosial dan pembangunan ekonomi (Rahman & Ismail, 2022).

DAPATAN DAN PERBINCANGAN

Daripada analisis literatur yang telah dibuat, dapatan kajian diatur sebagaimana objektif kajian yang telah dibuat iaitu mengenalpasti konsep dan kepentingan

pengagihan harta dalam Islam, mekanisme pemberian harta dan kaitan dengan maqasid syariah, hikmah kepelbagaian mekanisme pemberian harta dalam Islam dan cabaran dalam mengamalkan mekanisme pemberian harta.

i- **Konsep Dan Kepentingan Pengagihan Harta Dalam Islam**

Dalam Islam, harta bukan sekadar milikan individu tetapi amanah yang perlu diurus dengan adil bagi memastikan kesejahteraan sosial dan ekonomi. Pengagihan harta bertujuan mengelakkan jurang sosial yang luas serta menegakkan keadilan ekonomi melalui mekanisme seperti zakat, hibah, wakaf, sedekah, dan infaq. Islam menegaskan bahawa harta bukan hanya untuk dinikmati oleh pemiliknya semata-mata, tetapi perlu dikongsi untuk manfaat masyarakat, sebagaimana firman Allah SWT:

وَفِي أَمْوَالِهِمْ حَقٌّ لِّلسَّائِلِ وَالْمَحْرُومِ

Maksudnya: *"Dan pada harta-harta mereka ada hak untuk orang miskin yang meminta dan orang miskin yang menahan diri (daripada meminta)." (Az-Zariyat, 51:19)*

Ayat ini menegaskan bahawa dalam Islam, setiap individu yang memiliki harta mempunyai tanggungjawab sosial untuk berkongsi rezeki mereka dengan golongan yang memerlukan, sama ada melalui zakat, hibah, wakaf, atau sedekah, bagi memastikan kesejahteraan masyarakat dan keadilan ekonomi.

Pengurusan harta yang sistematik bukan sahaja memperkukuhkan institusi Islam seperti pusat zakat dan badan wakaf, tetapi juga menyumbang kepada maqasid syariah dengan memastikan keadilan sosial dan kestabilan ekonomi. Oleh itu, mekanisme pemberian harta yang berkesan dapat membantu mengurangkan kemiskinan, menggalakkan tanggungjawab kolektif, serta membangunkan sektor penting seperti pendidikan dan kesihatan, seterusnya menjamin kesejahteraan ummah secara menyeluruh (Mohamed et al., 2022).

ii- **Mekanisme Pemberian Harta Dan Kaitan Dengan Maqasid Syariah**

Analisis kajian ini mendapati bahawa setiap mekanisme pemberian harta dalam Islam seperti zakat, infaq, sedekah, wakaf, hibah, wasiat, fidyah, kafarah, dan qard hasan mempunyai peranan yang signifikan dalam merealisasikan maqasid syariah. Mekanisme-mekanisme ini bukan sahaja berfungsi sebagai instrumen pengagihan kekayaan, tetapi turut menyumbang kepada pemeliharaan agama, nyawa, akal, keturunan dan harta. Melalui pendekatan yang sistematik, pemberian harta ini dapat mengurangkan jurang sosioekonomi, memperkukuh solidariti masyarakat, dan memastikan kelestarian kesejahteraan umat. Justeru, hubungan antara mekanisme pemberian harta dan maqasid syariah boleh dirumuskan sebagaimana dalam Jadual 2.

Jadual 2: Mekanisme Pemberian Harta dan Kaitannya dengan Maqasid Syariah

BIL.	MEKANISME	DEFINISI	MAQASID SYARIAH YANG DICAPAI
1	Zakat	Pemberian harta yang diwajibkan kepada golongan asnaf tertentu seperti fakir, miskin, amil, muallaf, hamba, orang berhutang, fisabilillah, dan ibnu sabil. Zakat dikenakan ke atas harta tertentu seperti emas, perniagaan, pertanian, dan pendapatan setelah memenuhi nisab dan haul.	Ḥifẓ al-māl – menyucikan harta dan mengelakkan penimbunan kekayaan; Ḥifẓ al-nafs – membantu kelangsungan hidup asnaf; Ḥifẓ al-dīn – menyempurnakan rukun Islam.
2	Infaq & Sedekah	Pemberian harta secara sukarela kepada individu atau organisasi untuk tujuan kebajikan dan kesejahteraan masyarakat, tanpa mengharapkan balasan. Ia boleh berbentuk sumbangan kewangan, barangan, atau perkhidmatan.	Ḥifẓ al-nafs – menyokong kehidupan golongan miskin dan memerlukan; Ḥifẓ al-māl – membentuk sifat dermawan dan menyucikan jiwa.
3	Wakaf	Penyerahan harta secara kekal untuk manfaat umum, di mana manfaatnya digunakan untuk kepentingan masyarakat seperti pembangunan masjid, sekolah, hospital, dan pusat kebajikan.	Ḥifẓ al-dīn – menyokong institusi agama; Ḥifẓ al-‘aql – menyumbang kepada pendidikan; Ḥifẓ al-nafs – memberi manfaat kesihatan dan kebajikan; Ḥifẓ al-māl – memastikan pemeliharaan dan

BIL.	MEKANISME	DEFINISI	MAQASID SYARIAH YANG DICAPAI
			kesinambungan manfaat harta.
4	Hibah	Pemberian harta secara sukarela kepada individu tertentu semasa hidup tanpa sebarang balasan. Hibah sering digunakan untuk mengelakkan perebutan harta selepas kematian pemilik harta.	Hifz al-māl – pemindahan hak milik yang sah tanpa sengketa; Hifz al-nasl – memelihara keharmonian keluarga dan mengelakkan pertikaian warisan.
5	Wasiat	Arahan pemilik harta untuk pembahagian harta selepas kematiannya, di mana sehingga satu pertiga daripada harta boleh diwasiatkan kepada individu bukan waris atau tujuan kebajikan.	Hifz al-māl – perancangan harta selepas kematian; Hifz al-nasl – mengelakkan perebutan harta pusaka; Hifz al-dīn – menunaikan amanah si mati.
6	Qard Hasan	Pinjaman tanpa riba yang diberikan kepada individu atau organisasi dengan niat membantu tanpa mengenakan faedah atau keuntungan. Peminjam hanya perlu membayar jumlah yang dipinjam tanpa tambahan.	Hifz al-māl – membina ekonomi tanpa riba; Hifz al-nafs – membantu keperluan kewangan mendesak tanpa membebankan peminjam.
7	Fidyah & Kafarah	Bayaran atau sumbangan harta yang dikenakan sebagai tebusan bagi kesalahan dalam ibadah seperti puasa yang tidak dapat dilaksanakan atau melanggar sumpah tertentu dalam syariat Islam.	Hifz al-dīn – menebus pelanggaran syarak dan meningkatkan kesedaran tanggungjawab beragama; Hifz al-nafs – memberi manfaat langsung kepada golongan miskin yang menerima.

iii- Hikmah Kepelbagaian Mekanisme Pemberian Harta Dalam Islam

Hikmah di sebalik mekanisme ini dapat dilihat melalui beberapa aspek utama. Pertama, memastikan pengagihan kekayaan yang adil. Kekayaan tidak boleh dimonopoli oleh golongan tertentu sahaja, sebaliknya ia perlu diagihkan agar manfaatnya dapat dinikmati oleh seluruh Masyarakat sebagaimana firman Allah SWT dalam Al-Quran:

“...supaya harta itu jangan hanya beredar di antara orang-orang kaya dari kalangan kamu...”
(Surah Al-Hashr: 7)

Dalam konteks ini, zakat memastikan golongan asnaf seperti fakir, miskin, dan muallaf mendapat bantuan secara sistematik melalui pengagihan harta yang diwajibkan ke atas individu yang mampu (Saufi, Tuan Noor, et al., 2021). Wakaf pula berperanan dalam menyediakan sumber kekayaan yang berterusan untuk kepentingan awam, seperti pembinaan sekolah, hospital, dan masjid (Nuradi et al., 2024). Manakala sedekah dan infaq memberi peluang kepada sesiapa sahaja untuk menyumbang mengikut kemampuan masing-masing tanpa had tertentu. Dengan adanya mekanisme ini, Islam memastikan kekayaan tidak hanya tertumpu kepada golongan kaya, tetapi turut memberi manfaat kepada seluruh masyarakat.

Kedua, memenuhi keperluan berbeza dalam masyarakat. Islam menyediakan mekanisme pemberian harta yang fleksibel untuk memenuhi keperluan setiap individu yang mempunyai tahap keperluan yang berbeza. Sebagai contoh ialah bantuan jangka pendek seperti sedekah, fidyah, dan kafarah yang bertujuan untuk membantu individu yang memerlukan secara segera, terutamanya dalam situasi kecemasan seperti bencana alam, kelaparan, atau hutang mendesak. Sementara itu, bantuan jangka panjang seperti wakaf dan hibah memberi manfaat kepada generasi akan datang, contohnya wakaf dalam bentuk tanah atau bangunan yang digunakan untuk pendidikan atau kesihatan. Selain itu, mekanisme seperti wasiat dan hibah membolehkan pengagihan harta kepada individu tertentu secara adil, mengelakkan perebutan harta pusaka, serta memastikan harta digunakan dengan sebaiknya. Dengan adanya mekanisme yang berbeza ini, Islam dapat memenuhi pelbagai keperluan individu dalam pembangunan hidup mereka tanpa mengabaikan aspek keadilan dan kebajikan.

Ketiga, menjaga hak pemilik harta dan penerima dengan seimbang. Islam tidak menghalang seseorang daripada memiliki harta, tetapi ia menetapkan garis panduan agar pemilikan harta tidak membawa kepada ketidakadilan atau penindasan terhadap orang lain. Hibah dan wasiat membolehkan seseorang merancang pengagihan hartanya secara adil, memastikan hak waris tidak terabai serta mengelakkan konflik perebutan harta selepas kematian pemilik. Qard hasan, iaitu

pinjaman tanpa riba, memberi peluang kepada mereka yang memerlukan modal untuk menjalankan perniagaan atau memenuhi keperluan mendesak tanpa dikenakan faedah yang menindas. Kafarah, sebagai satu bentuk pembayaran tebusan untuk kesalahan dalam ibadah, memastikan bahawa pemilik harta dapat menebus kesilapan mereka sambil membantu golongan miskin. Dengan keseimbangan antara hak pemilik harta dan kepentingan penerima, Islam memastikan keadilan dalam pengurusan ekonomi dan sosial.

Keempat, sebagai ujian dan sumber pahala bagi umat Islam. Allah SWT menjadikan harta sebagai ujian bagi manusia, untuk melihat sama ada mereka menggunakannya dengan cara yang diredhai atau sebaliknya. Hal ini ditegaskan dalam firman-Nya:

"Dan belanjakanlah (harta kamu) di jalan Allah, dan janganlah kamu campakkan diri kamu ke dalam kebinasaan..."
(Surah Al-Baqarah: 195)

Bagi mereka yang memiliki kekayaan, harta adalah ujian untuk melihat sejauh mana mereka bersyukur dengan memberi dan membantu orang lain. Sebaliknya, bagi mereka yang menerima bantuan, mereka diuji dengan kesabaran dan kebijaksanaan dalam menggunakan harta tersebut. Dalam Islam, amalan pemberian harta seperti wakaf, hibah, dan infaq merupakan bentuk sedekah jariah, yang mana ganjarannya berterusan walaupun selepas kematian. Hadis Rasulullah SAW menyebut:

"Apabila mati seseorang insan, maka terputuslah amalannya kecuali tiga perkara: sedekah jariah (wakaf), ilmu yang dimanfaatkan, atau anak soleh yang mendoakannya." (Riwayat Muslim, No. 1631)

Maka, kepelbagaian mekanisme pemberian harta dalam Islam bukan sahaja berperanan dalam menyeimbangkan ekonomi dan sosial, tetapi juga menjadi peluang bagi umat Islam untuk mendapatkan ganjaran pahala yang berterusan.

iv- Cabaran Dalam Mengamalkan Mekanisme Pemberian Harta.

Pelaksanaan system pemberian harta masih berdepan dengan pelbagai cabaran walaupun Islam telah menyediakan satu sistem yang lengkap dan holistik. Hal ini menjejaskan pencapaian objektif utama iaitu pembinaan kesejahteraan masyarakat melalui maqasid syariah. Beberapa cabaran utama yang dapat dikenalpasti adalah kekurangan kesedaran masyarakat, kelemahan pengurusan institusi, dan keperluan reformasi dalam aspek perundangan serta teknologi.

Tahap kesedaran masyarakat terhadap kepelbagaian instrumen pemberian harta Islam masih rendah. Ramai umat Islam hanya memahami zakat sebagai mekanisme utama, sedangkan instrumen lain seperti wakaf, hibah, wasiat dan infaq turut memainkan peranan penting dalam mengimbangi ekonomi dan kebajikan sosial. Sebagai contoh, wakaf sering disalah tafsir sebagai sumbangan untuk tujuan ibadah semata-mata, sedangkan ia juga berpotensi dimanfaatkan dalam sektor pendidikan, kesihatan dan keusahawanan (Saufi, Mohamed, et al., 2021). Kurangnya pendidikan dan pendedahan mengenai instrumen ini menyebabkan potensi wakaf dan hibah sebagai alat pemberdayaan ekonomi umat Islam tidak dimanfaatkan sepenuhnya.

Seterusnya pula adalah kelemahan dalam sistem pengurusan institusi pemberian harta. Isu ketelusan, kecekapan serta kelewatan pengagihan dana zakat masih wujud, di mana bantuan tidak sampai kepada golongan asnaf yang benar-benar memerlukan (Mahmood et al., 2017). Dalam konteks wakaf, banyak aset tidak dimanfaatkan secara produktif akibat pentadbiran yang lemah dan kekurangan dana penyelenggaraan, menyebabkan aset wakaf terbengkalai serta menjejaskan sumbangannya terhadap pembangunan sosial seperti pendidikan dan kesihatan (Jusoh & Mat, 2024).

Akhir sekali, pelaksanaan mekanisme pemberian harta Islam turut berdepan keperluan reformasi dalam aspek perundangan dan penggunaan teknologi. Sesetengah peraturan berkaitan hibah, wasiat dan wakaf masih belum dikemas kini mengikut keperluan semasa, sekali gus menimbulkan kekeliruan dan pertikaian

dalam pelaksanaannya. Di samping itu, kemajuan teknologi seperti *blockchain* dan *smart contracts* masih kurang dimanfaatkan dalam pengurusan zakat dan wakaf, sedangkan teknologi ini mampu meningkatkan ketelusan dan kecekapan pentadbiran (Nuradi et al., 2024). Kekurangan kepakaran serta ketiadaan kerangka undang-undang yang menyokong pelaksanaannya masih menjadi cabaran yang perlu diatasi bagi memperkukuh sistem pemberian harta Islam.

KESIMPULAN

Mekanisme pemberian harta dalam Islam merupakan sistem menyeluruh yang menyumbang kepada pembangunan sosioekonomi dan kesejahteraan insan. Instrumen seperti zakat, infaq, sedekah, wakaf, hibah, wasiat, fidyah, kafarah, faraid dan qard hasan bukan sahaja mengukuhkan jaringan sosial, tetapi juga memastikan pengagihan kekayaan yang adil mengikut maqasid syariah. Namun, pelaksanaannya masih berhadapan dengan cabaran seperti tahap kesedaran masyarakat yang rendah, kelemahan institusi pengurusan, isu undang-undang serta penggunaan teknologi yang terhad. Oleh itu, beberapa penambahbaikan strategik diperlukan mengikut kategori instrument.

Pertama, kategori filantropi islam wajib iaitu zakat. Zakat sebagai tunggak sistem pemberian harta wajib memerlukan pengurusan moden dan efisien agar manfaatnya sampai kepada golongan sasaran. Pendidikan kewangan Islam perlu diperkasakan supaya masyarakat memahami peranan zakat dalam menjaga keseimbangan sosioekonomi (Yakob et al., 2021). Teknologi kewangan seperti aplikasi pembayaran zakat, sistem pangkalan data asnaf, serta integrasi analitik data boleh meningkatkan ketelusan dan keberkesanan agihan.

Kedua, kategori filantropi islam sunat seperti wakaf, hibah, infaq, sedekah dan qard hasan. Instrumen sunat ini berpotensi besar menyokong pembangunan masyarakat secara berterusan. Pengurusan wakaf perlu dipertingkat melalui penggunaan teknologi seperti *blockchain* bagi memastikan ketelusan urus tadbir serta mengelakkan penyelewengan. Penubuhan dana pelaburan wakaf juga boleh

menjana manfaat jangka panjang bagi tujuan pendidikan, kesihatan dan kebajikan umum (Wan Suraya, 2017).

Bagi hibah, garis panduan lebih jelas diperlukan supaya masyarakat memahami prosedur dan kepentingan dokumentasi yang betul. Untuk infaq dan sedekah, pendekatan moden seperti crowdfunding Islamik dan platform e-Sedekah boleh diguna pakai bagi memudahkan kutipan serta menambah kepercayaan penyumbang. Qard hasan pula perlu digiatkan melalui institusi kewangan Islam bagi membantu golongan memerlukan tanpa beban riba.

Ketiga, kategori denda atau kewajipan berkaitan kewangan iaitu fidyah dan kafarah. Instrumen seperti fidyah dan kafarah berfungsi sebagai mekanisme pembetulan dan pemulihan spiritual serta sosial. Platform digital perlu diwujudkan bagi memudahkan pembayaran fidyah dan kafarah secara telus. Ketetapan dan garis panduan syariah berkaitan perkara ini juga perlu disebarluaskan agar masyarakat memahami kewajianannya dan tidak menangguhkannya. Pengurusan fidyah yang bersistematik dapat memastikan dana sampai kepada golongan yang benar-benar memerlukan.

Keempat pula ialah kategori pengagihan warisan seperti wasiat dan faraid. Wasiat dan faraid memainkan peranan penting dalam memastikan harta diagihkan secara adil menurut ketetapan syariah. Reformasi undang-undang perlu memperkukuh proses dokumentasi wasiat, mempercepat pewartaan, serta mengurangkan birokrasi dalam pengurusan pusaka. Mahkamah syariah perlu diberi ruang lebih luas untuk menyelesaikan pertikaian berkaitan wasiat dan faraid, manakala literasi masyarakat tentang pengurusan harta pusaka perlu dipertingkatkan agar perebutan dan salah faham dapat dielakkan.

Secara keseluruhan, mekanisme pemberian harta dalam Islam sama ada wajib, sunat, berbentuk denda kewangan, atau pengagihan warisan merupakan instrumen penting dalam menjamin kesejahteraan rakyat dan pembangunan sosioekonomi berpaksikan maqasid syariah. Dengan pelaksanaan yang cekap, penggunaan teknologi moden, pendidikan berterusan, serta pembaharuan undang-undang yang

relevan, sistem ini berpotensi menjadi asas kuat kepada pembentukan masyarakat Islam yang adil, harmoni dan makmur.

RUJUKAN

- Al-Ghazali. (1997). *Al-Mustasfa min 'Ilm al-Usul* (Vol. 1). Beirut: Dar al-Kutub al-'Ilmiyyah.
- Al-Qaradawi, Y. (2000). *Fiqh al-Zakat: Dirasah Muqaranah li Ahkamihi wa-Falsafatihi fi Dau' al-Qur'an wa-al-Sunnah* (Vol. 1). Cairo: Maktabah Wahbah.
- Al-Zuhayli, W. (2006). *Al-Fiqh al-Islami wa Adillatuhu* (Vol. 4). Damascus: Dar al-Fikr.
- Ibn Qudamah. (1992). *Al-Mughni* (Vol. 5). Beirut: Dar al-Fikr.
- Bowen, G. A. (2009). Document analysis as a qualitative research method. *Qualitative Research Journal*, 9(2), 27–40. <https://doi.org/10.3316/QRJ0902027>
- Creswell, J. W. (2018). *Research design: Qualitative, quantitative, and mixed methods approaches* (5th ed.). SAGE Publications.
- Ishak, M. S., Yusoff, M. Z., & Aziz, A. (2019). Wealth distribution instruments in Islam: An analysis of zakat, waqf and hibah practices. *International Journal of Islamic Economics and Finance Research*, 2(1), 34–48.
- Jalal, S., & Che Abdullah, A. S. . (2024). Challenges of collecting zakat on digital assets : A case study of selected states Kuala Lumpur, Selangor, and Perlis. *The Journal of Muamalat and Islamic Finance Research*, 21(1), 32–48. <https://doi.org/10.33102/jmifr.545>
- Jusoh, R., & Mat, H. (2024). Faktor-faktor yang mempengaruhi niat berwakaf tunai melalui skim potongan gaji di malaysia. *Journal of Management and Muamalah*, 14(1), 67–87. <https://doi.org/10.53840/jmm.v14i1.190>
- Khairi, K. F., Ahmad, A., Laili, N. H., Sabri, H., & Shaari, R. (2022). Kontrak pintar dalam transaksi kutipan zakat melalui pembangunan sistem demo backend platform blockchain di MAIWP-PPZ. *AZKA International Journal of Zakat & Social Finance*, 3(1), 103–124. <https://doi.org/10.51377/azjaf.v3i1.96>
- Mahmood, R. H., Mustaffha, N., Musafar Hameed, L. B., & Johari, N. (2017). Pengurusan wakaf di Malaysia: Isu dan cabaran. *4th International Conference on Management and Muamalah 2017 (ICoMM 2017)*, 2017(ICoMM), 43–51.
- Mohamed, N. A., Saufi, S., Abdul Ghani, H., & Muhammad Saleh, M. (2022). *Wakaf*

ekonomi sebagai model baharu pembangunan ummah secara mampan. KIAS-JAHEAIK

- Mohd Arif, M. I. A., Adenan, F., & Moidin, S. (2023). Analisis perundangan terhadap pelaksanaan akad hibah amanah dalam industri kewangan Islam di Malaysia. *Akademika*, 93(3), 197–211. <https://doi.org/10.17576/akad-2023-9303-15>
- Mohd, A. M., Yaacob, M. Y., & Salleh, M. F. (2021). Awareness and understanding of Islamic wealth distribution instruments among Malaysian muslims. *Journal of Muamalat and Islamic Finance Research*, 18(1), 73–85.
- Mohd, S., Rahman, F., & Latif, N. A. (2021). The role of Islamic inheritance and wealth transfer mechanisms in achieving social justice. *Journal of Contemporary Islamic Research*, 13(3), 77–95.
- Mohd Yusof, Z. A., Ab Rahman, A., & Syed Shamsuddin, S. S. (2024). Analisis literatur secara sistematik pendekatan pengurusan zakat dalam usaha membasmi kemiskinan pasca pandemik. *Journal of Fatwa Management and Research*, 29(1), 167–185. <https://doi.org/10.33102/jfatwa.vol29no1.578>
- Nazeri, A. N. N., & Mohd Nor, S. (2023). The implementation of blockchain technology in the zakat management system: A conceptual research. *Journal of Information Systems and Digital Technologies*, 5(2), 287–300. <https://doi.org/10.33102/jisdtd.v5i2.419>
- Nuradi, Nurul Huda, & Husnul Khatimah. (2024). Inovasi wakaf di era digital dalam mengoptimalkan potensi untuk pembangunan berkelanjutan di negeri berkembang. *El-Mal: Jurnal Kajian Ekonomi & Bisnis Islam*, 5(6), 3546–3559. <https://doi.org/10.47467/elmal.v5i6.2773>
- Rahman, H. A., & Ismail, R. (2022). *The effectiveness of waqf asset management in Malaysia: Issues and solutions. Malaysian Journal of Shariah and Law*, 10(1), 25–41.
- Rahman, N. H., & Ismail, M. F. (2022). Legal and administrative challenges in the implementation of Islamic wealth management mechanisms in Malaysia. *Malaysian Journal of Syariah and Law*, 10(1), 101–118.
- Saufi, S., Mohamed, N. A., Saleh, M., Ghani, H. A., Noor, S., Puri, N., Bharu, K., Kelantan, M., & Saufi, S. (2021). Hubungan tahap kefahaman masyarakat terhadap sumbangan wakaf dengan kepercayaan terhadap institusi pengurusan wakaf di malaysia. *Al-Mimbar: International Journal of Mosque, Zakat And Waqaf Management*. <http://almimbar.kuis.edu.my>
- Saufi, S., Tuan Noor, T. M. S., & Abu Hasan Shaari, M. A. (2021). Faktor-faktor yang boleh mempengaruhi kejayaan usahawan di kalangan asnaf di Malaysia : Satu tinjauan literatur. *Al-Mimbar: International Journal of Mosque, Zakat And Waqaf*

Management, 1(2), 61–67.

Wan Suraya, W. H. S. A. S. S. S. W. S. S. U. S. M. Z. R. M. (2017). *Penguatkuasaan akta perkhidmatan kewangan Islam 2013 : Tinjauan Pelaksanaan Penamaan Dan Hibah Ke Atas Syarikat MAA Takaful Sdn Bhd. January 2018.*

Yakob, S., Fahrizal, A., & Muhammad, A. (2021). Hubungan antara literasi kewangan dan prestasi perusahaan kecil dan sederhana : Dimensi pengurusan kewangan dan literasi. *International Journal of Muamalat*, 5(1), 55–75. https://ijm.unishams.edu.my/images/pdf_file/vol_5_dec2021/IJM_2021_eISSN_5.pdf

Zaki, A., Mushtaq, A., Hamdard, U., & Mokal, M. N. (2022). Waqf management through fintech in Malaysia. *Journal of Islamic Finance*, 11(2), 34–47. <https://journals.iium.edu.my/iiibf-journal/index.php/jif/article/view/829>